

Comun General de Fascia: che sie zacan la outa bona?

La conferenza di ombolc à fat fora de ruèr a l'aproazion del statut te duc i comuns duc da la metà de dezember, ma la cordanza sul document somea esser amò dalonc

L'aproazion definitiva del Statut del Comun General de Fascia cognessa vegnir tutta sù te duc i comuns de Fascia inant de la metà del meis de dezember che vegn.

Via per chesta setemènes passèdes i ombolc aea l'encèria de ge prejentèr a si conseieres l'ultim sbos, aproà da la conferenza ai 11 de november passè, per dapò passèr a sia aproazion definitiva.

L. prum comun a l'aer aproà a l'unanimità l'è stat chel de Mazin che se à binà en lunc passà. "I conseieres à domanà vèlch schiariment – à dit l'ombolt Fausto Castelnovo – ma dapò duc a lità a favor."

Ence l comun de Ciampedel, chiamà ite semper en lunc passà, à aproà sia adozion ma co la stima de contra de Giuseppe Lazzer e de

astension de Lino Davarda e Aldo Bernard che aea jà levà si dubies en ocazion de la prejentazion da man de l'ombolt Leonardo Bernard.

Delaite del consei de comun de Poza, che empruma en lunc a tout dant l statut, l'è stat palesà mèlcontenc soralut dai conseieres Pierluigi Tava che à defeni l Procurador "n fantoccio che cognarà sotstèr al voler di ombolc" e dal conseier Claudio Bernard che se à lamentà che no l'è stat tout su la istanzes portèdes dant da le Asuc.

Ence te consei de comun de Soraga i conseieres à levà si dubies. Devi Brunel à sottrissà che la formulazion del Statut penalisea dassen i picoi comuns e en particulèr chel de Soraga che risiassa de no aer nesciun raprezentant te l'esecutif del nef ent. Per garantir "respet e

degnità valiva per duc" l'è stat donca aproà na deliberà olache vegn domanà de mudèr l statut del Comun General de Fascia acioche te l'esecutif del nef ent fae pèrt n raprezentant de ogne comun.

Dubies ence per vèlch conseier del comun de Cianacei, olache aboncont en lunc ai 30 de november l'è pervedù sia aproazion.

Te consei de comun de Moena se à levà forta la posizion de contra del conseier Alberto Felicetti che à manà fora enstadi n lonch comunicat per rebadir sia conscidrazions.

Posizions de contra ence te consei de comun de Vich olache ence l'ombolt Gino Fontana no à mai neà sia posizion critica a chest statut del Comun General de Fascia. Segur no sarà n troi sorì. (mci)



La senta del Comprenjorie Ladin de Fascia.

"L'è stat dut l temp per n descorer, ades l'è ora grana de aproèr e pontèr via"

La conscidrazions del president del Comprenjorie ladin de Fascia Leonardo Bernard

I Consees de Comun à aproà o tout dant chisc dis l sbos del Statut del Comun General de Fascia. Che tempes ve aede dat?

"L'aproazion del statut del Comun General de Fascia la cogn passèr dal Consei provinzièl, donca l'è tempes tecniches belebon prezisc per ge consentir a l'ofize de la Provinzia de meter jù sia sentèdes per i meis che vegn. Se volon poder ruèr a la litazions del Comun General ensema con la litazions amministratives de l'aisciuda cognon vardèr de ge consegnèr la deliberes de aproazion de Consees de Comun inant dai 10 de dezember. Te la conferenza di ombolc se aon cordà per chesta data, e ence chi, desche l'ombolt de Vich, che à fat a saer da temp de no condivider chest sbos, à dit che l'aessa portà te consei per l'aproazion."

Ampò ti consees de comun no pel vegnir fat mudazions...

"Na, l pel demò vegnir aproà o manco. Se n Consei l'è empontassa percheche l vel che vegne tout sù de altra osservazion, cognessa vegnir fat endodanef dut l'iter. No l'è più i tempes, cree che sie stat dat temp a duc de descorer sun chest statut, chest l'è chel che l'è stat aproà da la conferenza di ombolc, faziile sarà ite amò vèlch imperfezion, ma i ponc emportanc, desche la modalitè de nomina del Procurador, i è stac touc en conscidrazion. Ades l'è ora dalbon de l meter a jir e de pontèr via con chest Comun General de Fascia, dapò endèna l percors de compagnament, se sarà da fèr mudazions, se podarà les fèr."

E se un di set Consees de Comun no aproa l statut, che sozedel?

"Ge cree che se n Consei de comun no l'aproa l statut faziile sutarà dut l'iter pissà te cerc tempes e donca restarà amò l Comprenjorie per n trat de temp. Fossa ben na desfata, percheche i tempes per n

descorer i è stac, chi che volea dir sie pensier à abù l temp de l fèr. Ades ogneun cogn se tor sia responsabilità."

Dò la pruma prejentazion l'è stat amò domanà osservazions, colones el stat tout sù?

"Su l'ultim sbos da la comunanza l'è ruà osservazions da la Consulta de la Families, da n conseier del Comun de Soraga, dai Capifrazions de duta la val e dapò da la lista Fassa, che aboncont è ruèdes dò i tempes stabili e no aon più podù verjer n confront. La osservazions è states toutes sù, fora che la domana de la Frazions che volea che tel Consei vegne resservà n post per i capifrazion, ma chest no podaane l'azetèr."

Se fossa da fèr vèlch mudament al statut più inant, colon fossel l'iter?

"Descheche disc l'articol 23, per la revizion del statut se pel intervegnir diretament travers na deliberazion del Consei general, enveze per mudazions più emportantes se cognessa fèr endodanef dut l'iter, donca deliberèr l'è Consees de comun e passèr la deliberes per na neva aproazion te Consei provinzièl. Ge no è tema de chisc passajes, ence se zachei aessa volù tor demez chest vincol de l'aproazion del statut desche lege provinzièla: se cogn aer l coraje de se tor la responsabilità e dezider se dalbon l'è da portèr mudazions."

Zachei veit l passaje provinzièl desche na limitazion de l'autonomia de Fascia...

"Gé na la veide cossita, alincontra l'è proprio l Consei Provinzièl che limitea si poder de intervent sul statut; a Trent i pel demò l'aproèr, ma no i pel tochèr nia, la mudazions pel ruèr demò da Fascia. A Trent i pel proponer mudaments per duta l'autra comunetèdes de val, e i territories cogn i azetèr, te nosc cajo enveze la forma de autotutela

perveduda te l'art. 19 è stata pissèda col didament de persones competentes e l'è na prerogativa spezifica per noscia realtà."

Che perveidel avisa l statut? L'è na fasa transitoria e dapò na organizazion desferenta...

"L sbos del statut è tel sit del Comprenjorie, duc pel jir a l veder. Aboncont l'è emportant spieghèr delvers percheche aon volù pontèr demez cossita. L'è giust che la jent posse litèr chi che ge desc più fiduzia, donca bel fossa poder jir subito a litazion diretta, ma la litazions diretes a livel naziònel e giuridich no les è recognosciudes da la costituzion. A livel provinzièl i è dò che i vèrda de comeder fora chest fal e l'è jà propostes de modifica de la lege che va a copier nosc entendiment per l Comun General de Fascia. Mec componenc i vegn litè da la jent e mec dai Consees de Comun, cossita en pèrt vegn raprezentà l pòpol e en pèrt l'amministrations. Te chest moment no se podea jir a litazion diretta, defat te altra comunetèdes, desche tel Primier, l'assemblea è fata da raprezentanc di comuns e l president l vegn lità de l'assemblea."

Nos aon vardà che te la pruma fasa de 5 egn vegne raprezentà i comuns, perche l'è besegn de compagnèr chesta neva istituzion, donca te l'assemblea l'è pervedù 31 elemenc, 14 litè dai Consees de comun (un de la mendranza), 7 ombolc che va ite de derit e etres 10 componenc esprescion del pòpol: l Procurador, l secondo candidat Procurador più lità, e etres 8 litè da la jent. No l'è stat pervedù la prejentazion de listes: chi che vel se meter a la leta cogn se prejentèr con 80 sotescrizions, toutes sù te amàncol doi comuns desferenc. Te la seconda fasa, dal 2015 inant, sarà semper 31 componenc, 14 vegnarà litè dai Consees de Comun e i etres 17 sarà esprescion de la jent co la litazion diretta; i ombolc, se no i è anter i 14 cernui dai comuns, i

podarà tor pèrt ma zenza derit de stima. L candidat Procurador arà na sia lista, n so program e si obietives, valif sistem litèl di comuns che à più che 3.000 sentadins. Dò l 2015 vegnarà ence desferenzià la encèries: l Consei di ombolc sarà l'orghen politich, e nesciugn vegnarà paà ajache i vegn jà paè te comun; l Consei de procura, enveze arà l'encèria de meter en pratega chel che ge vegn dit dal consei general, sarà persones de fiduzia del Procurador che doventarà funzionaries a duc i efec."

Zachei à levà critiches sul fat che l Procurador fossa massa debol, etres à tema che la listes porte a politicizèr massa, Vo che n dijede?

"Gé spere che duc chi che chela de se dèr jù per chesta istituzion no i la veide demò desche na oportunitè per fèr politica, ma per fèr vèlch per l ben comun, ajache i arà soralut da amministrèr."

Ti prumes 5 egn l Procurador arà soralut na encèria de mediazion anter la amministrazioni e la jent: l'è emportant che sie i ombolc che ge desc na man, i cognarà lurèr en sinergia e donca per chisc egn aon pervedù che l Consei de Procura e l Consei di Ombolc se sorapee e la pèrt politica e la pèrt gestionèla vegne toutes sù da la medema persones. Peisse che se se aessa volù desferenzièr subito la robes fossa stat più senester; canche te la jonta del C11 no l'era i ombolc, se à vedù che ogne dezizion se sperlongèa percheche la coguea amò passèr te Comun."

L'esperienza de chisc egn à moscià che de spes i ombolc i à da fèr assà per so comun e i stenta a jir sorafora l ciampamil: l Procurador arà na encèria dalbon senestra...

"Ei, l'è na endesfida n muie grana, ma gé è fiduzia te chi che se metarà en jech. Amministrèr anchecondi no l'è più ge resservèr demò na picola

pèrt de temp a la politica. Per l'esperienza che è fat te chisc 5 egn te Comprenjorie sé che la è dura, no se pel pertener che i ombolc sie semper atives e prejenc. L'è per chest che l Comprenjorie no à respetà i obietives per chel che l'era stat metù sù ti egn '70, ence se chel de Fascia à fat miec respet ai etres. Ades se cogn mudèr sistem e l'envit che fae l'è proprio chest: chi che vel se candidèr desche ombolt chest'aisciuda che vegn i cogn saer che i se tolarà sù n ruol emportant ence delaite del Comun General."

La figures de Procurador e de ombolt sarà incompatiboles. Che farede chest'asciuda?

"No sé, l'è senester per me dezider, perche te comun è amò tanta robes da portèr inant e aesse gust de fenir, ma no me endespijessa poder me meter a la leta tel Comun General perche peisse de esser na persona che à semper chieri l confront e la condivizion. A fèr l Procurador sarà dalbon tant da lurèr, ma se un tel sù chest lurera con gaisa l pol fèr bela fugia, percheche l'è duta la condizions per creèr n ent dalbon fort. Besegna demò ge creèr." (lg/mci)



L president del Comprenjorie Ladin de Fascia Leonardo Bernard.